

修訂日期: 2004/10/22 發行日期: 2006/2/15

發行單位: 中華電子佛典協會 (CBETA) <http://www.cbeta.org>

資料底本: 大正新脩大正藏經 Vol. 21, No. 1325

原始資料: 蕭鎮國大德提供, 北美某大德提供

No. 1325

佛說療痔病經

大唐三藏義淨奉 制譯

如是我聞。一時薄伽梵。在王舍大城竹林園中。與大苾芻眾五百人俱。時有眾多苾芻身患痔病。形體羸瘦痛苦縈纏。於日夜中極受憂惱。時具壽阿難陀見是事已詣世尊所。頂禮雙足在一面立。白言世尊。今王舍城多有苾芻。身患痔病形體羸瘦痛苦縈纏。於日夜中極受憂惱。世尊此諸痔病云何救療。佛告阿難陀汝可聽此療痔病經。讀誦受持繫心勿忘。亦於他人廣為宣說。此諸痔病悉得除差。所謂風痔熱痔癢痔三合痔。血痔腹中痔鼻內痔。齒痔舌痔眼痔耳痔。頂痔手足痔脊背痔屎痔。遍身支節所生諸痔。如是痔瘻悉皆乾燥。墮落消滅畢差無疑。皆應誦持如是神呪。即說呪曰。

怛姪他 揭賴米 室利 室利 魔揭室至三磨[革*天]都莎訶

此呪(丹藏云)。

怛姪他 頰闌帝 頰藍謎 室利鞞 室里室里 磨羯失質 三婆跋靚 莎訶

阿難陀於此北方有大雪山王。中有大莎羅樹名曰難勝。有三種華。一者初生二者圓滿。三者乾枯。猶如彼華乾燥落時。我諸痔病亦復如是。勿復血出亦勿膿流。永除苦痛悉皆乾燥。又復若常誦此經者。得宿住智能憶過去七生之事。呪法成就莎訶。又說呪曰。

怛姪他占米 占米捨占米 占沒儻捨占泥 莎訶

佛說是經已。時具壽阿難陀及諸大眾。皆大歡喜信受奉行。

佛說療痔病經